

歲時廣記

三





歲時廣記

(三)



陳元靚編

一九三九年十二月初版

陳元靚編

歲時廣記

冊三

商務印書館出版

上海市印刷四廠印刷

歲時廣記卷二十七

七夕中

乘浮槎

張茂先博物志舊說天河與海通近世有人居海上者每年八月見浮槎來不失期心竊異之候其復來乃賈一年糧乘之十餘日猶見日月星風自後茫然亦不覺晝夜忽至一處有城郭屋舍甚盛遙望宮中有婦人織見一丈夫牽牛渚次飲之驚問曰何由至此其人說與來意并問此是何處答曰君至蜀郡訪嚴君平則知矣不及登岸復乘槎還家徑入蜀問君平君平曰某年月日有客星犯牛宿計其年月日正是此人到天河也宗懷作荆楚歲時記乃引博物志直謂張騫乘槎宗懷不知何據趙璘因話錄亦嘗辨此事杜甫詩云乘槎斷消息無處問張騫又查上似張騫似亦誤也東坡七夕詞云乘槎歸去成都何在萬里江濤蕩漾與君各賦一篇詩留織女鴛鴦機上又詩云豈如乘槎天女側獨倚雲機看織紗山谷詞云待乘槎仙去若逢海上白頭翁共一訪癡牛駢女

得機石

荆楚歲時記漢武帝令張騫使大夏尋河源乘槎經月而去至一處見城郭如官府室內有一女織又見一丈夫牽牛飲河騫問曰此是何處答曰可問嚴君平織女取揩機石與騫而還後至蜀問君平君平曰

某年月日客星犯牛女所得搘機石爲東朔所識按騫本傳及大宛傳騫以郎應募使月氏爲匈奴所留十餘歲得還騫身所至者大宛大月氏大夏康居而傳聞其旁大國五六具爲天子言其地形所有並無乘槎至天河之謂而宗慤乃傳會以爲武帝張騫之事又益以搘機石之說藝苑雌黃云今成都嚴真觀有一石呼爲支機石相傳云漢君平留之予寶歷中下第還家於京師道次逢官差遞夫昇張騫槎先在東都禁中今準詔索有司取進不知真何物也宋之間明河篇云明河可望不可親安得乘查一問津更將織女支機石還訪成都賣卜人查與槎同劉禹錫七夕詩云機罷猶安石橋成不礙查杜子美詩云聞道尋源使從天北路回牽牛去幾許宛馬至今來又陳無己七夕詩云早晚望夫能化石盡分人世作支機

賜壽考

神仙感遇傳郭子儀華州人也初從軍沙塞間因入京催軍食回至銀州數十里日暮忽風沙斗暗行李不得隨入道旁空屋中藉地將宿既夜忽見左右皆有赤光仰視空中忽見輜車綉幄中有美人坐床垂足自天而下俯視子儀子儀拜祝云今七月七日必是織女降臨願賜長壽富貴女笑曰大富貴亦壽考言訖冉冉昇天猶視子儀良久而隱子儀後立功貴盛威望烜赫大歷初鎮河中疾甚三軍憂懼公謂御醫及幕賓王延昌孫宿趙惠伯嚴郢曰吾此疾自知未便衰殞因話所遇之事衆皆稱賀忻悅其後拜太尉尚書令尚父年至九十而薨

乞富貴

風土記七月七日其夜灑掃庭除露施几筵設酒脯時果散香粉於筵上祈請何鼓織女言此二星當會守夜者咸懷私願或云見天漢中有奕奕白氣或光耀五色以此爲徵應見者便拜而陳願乞富乞壽無子乞子唯得乞一不得兼求三年後方得言之頗有受祚者歐陽永叔詩云奕奕天河光不斷有人正在長生殿蔡持正七夕詩云焚香再拜穿華線候得神光白氣飛

祈恩需

天寶遺事明皇與妃子每七夕往華清宮遊宴時宮女陳瓜果酒饌列於庭中祈恩牛女又各捕蜘蛛閉小盒中至曉開視以驗得巧之多少民間爭效之杜子美詩云蛛絲小人態結綴瓜果中

去蹇拙

柳柳州文集乞巧文云柳子夜歸自外庭有設祠者齧餌馨香蔬果交羅且拜且祈恠而問焉女隸進曰今茲秋孟七夕天女之孫將嬪於何鼓邀而祠者幸而與之巧驅去蹇拙手目開利組紐縫製無滯於心焉柳子曰吾亦有大拙儻可因是以求去之乃再拜而進曰臣有大拙智所不化鑿所不攻威不能遷寬不能容云云

丐聰明

歲時雜記七夕京師諸小兒各置筆硯紙墨于牽牛位前書曰某乞聰明諸女子致針綫箱笥於織女位

前書曰某乞巧。

益巧思

吳淑祕閣閒談蔡州丁氏精於女工每七夕禱以酒果忽見流星墜庭中明日於瓜上得金梭一枚自是巧思益進。

留寶枕

墨莊冗錄太原郭翰少有清標姿度秀美善談論尙草隸當暑乘月臥庭中時有微風稍聞香氣翰甚恠之仰視空中有人冉冉而下直至翰前乃一少女也明豔絕代光彩溢目衣玄綃之衣曳霜羅之帔戴翠翹鳳凰之冠躡復文九章之履侍女二人皆有殊色翰整衣巾拜謁曰不意真靈迺降願垂德音女微笑曰吾天之織女久無主對而佳期阻曠幽態盈懷上帝賜命許遊人間仰慕清風願託神契翰曰非敢望也乃所願也女敕侍婢淨掃室中張霜霧丹縠之幘施水晶玉華之簾轉回風之扇宛若清秋乃攜手升堂解衣共寢並同心龍腦之枕覆雙縷鴛文之衾膩體柔肌深情密態妍豔無匹欲曉辭去自後夜夜往來情好轉切翰戲之曰牽郎何在那敢獨行對曰陰陽變化關渠何事且河漢隔絕無可復知縱使知之不足爲慮因相與談論星辰躔度列宿分位翰遂洞曉之後將至七夕忽爾不來數夜方至翰問曰牽郎相見樂乎笑而對曰天上那比人間正以期運當爾非有他故况一年一度相會爭如今日夜夜相逢君毋猜忌又問曰卿來何遲曰人中五日彼一夕也經一年忽一夜悽惻流涕執翰手曰帝命有程便當永

訣以七寶枕留贈曰明年此日當奉書音翰報以玉環一雙騰空而去及期遣侍女奉書函至言詞清麗情意重疊未有詩二首其一云河漢雖云闊三秋尙有期情人知有意良會在何時又曰朱閣臨清漢瓊宮繙紫房佳期情在此只是斷人腸翰亦謝以詩曰人世將天上由來不可期誰知一回顧交作兩相思又曰贈枕猶香澤啼衣尙淚痕玉顏霄漢裏空有往來魂是歲太史奏織女星失度無光翰官至御史

授欽鋗

陳鴻長恨傳唐玄宗在位以聲色自娛宮中萬數無悅目者駕幸華清宮上心油然恍若有遇詔高力士潛搜外宮得宏農楊元琰女子於壽邸旣笄矣鬟髮膩理纖穠中度舉止閒冶別疏湯泉詔賜澡瑩旣出水體弱力微若不任羅綺光彩煥發轉照動人上不勝悅進見之日奏霓裳羽衣以導之定情之夕授金釵錦合以固之明年冊爲貴妃半后服用治容敏詞婉變萬態與上行同輦止同宮宴專席寢專房雖有三夫人九嬪二十七世婦八十一御妻暨後宮才人樂府妓女使天子無顧盼者民謠云生女勿悲酸生男勿喜歡又云男不封侯女作妃君看女卻爲門楣人心羨慕如此天寶末安祿山引兵向闕以討楊妃爲辭玄宗幸蜀道次馬嵬六軍徘徊不進當時敢言者請以貴妃塞天下之怒上知不免反袂掩面使牽貴妃而去就絕於尺組之下肅宗受禪大駕還都尊玄宗爲太上皇每春花秋月天顏不怡適有方士楊外傳云方士即楊通幽也自蜀而來知上皇念楊妃自言有李少君術上皇大喜命致其神方士竭術索之不至又遊神馭氣旁求四虛極天涯跨蓬壺有洞戶東向署曰玉妃太真院方士抽簪扣扉有雙鬟應門復入俄

有碧衣侍女繼至。詰所從來。方士稱唐天子使者。且致其命。碧衣云。玉妃方寢。請少待之。頃間。碧衣延入。且曰。玉妃出見。一人冠金蓮。披紫絹。佩紅玉。曳鳳鳥。左右侍者七八人。揖方士。問皇帝安否。次問天寶十四年已還事。言訖。憫然指侍女取金釵鈿合各折其半。授使者曰。爲謝上皇。謹獻是物。尋舊好也。方士受辭與信。將行。色有不足。玉妃因徵其意。復前跪致辭。乞當時一事不聞於它人者。驗於上皇。不然。恐鈿合金釵。負新垣平之詐也。玉妃茫然退立。若有所思。徐而言曰。昔天寶十載。侍輦避暑驪山宮。秋七月。牽牛織女相見之夕。秦人風俗。夜張錦綉。陳飲食。樹花燔香於庭。號爲乞巧。宮掖間尤尚之。時夜始半。休侍衛於東西廂。獨侍上。上憑肩而立。因仰天感牛女事。密相誓心。願世世爲夫婦。言畢。執手各嗚咽。此獨君王知之耳。因自悲曰。由此一念。又不復居此。當墮下界。且結後緣。或天或人。決再相見。好合如舊。使者還奏。皇心嗟悼久之。餘見唐史。白居易作長恨歌云。臨別殷勤重寄詞。詞中有誓兩心知。七月七日長生殿。夜半無人私語時。後人又作伊州曲云。金雞障下胡雞戲。樂極禍來。漁陽兵起。鸞輿幸蜀。玉環縊死。馬嵬坡下塵浮。夜對行宮皓月。恨最恨春風桃李。洪都方士念君繁。繫妃子蓬萊殿裏覓。尋太真宮中睡。起遙謝君意。淚流瓊臉。梨花帶雨。髣佛霓裳初試。寄鈿合共金釵。私言徒爾。在天願爲比翼。同飛居地。應爲連理雙枝。天長與地久。唯此恨無已。

化土金

夷堅乙志。起居注。南安軍南康縣民陽大明葬父於黃公坑山下。結廬墓側。所養白雞爲狸捕去。藏之石

穴次夕雷震石粉碎。狸死焉。人以爲孝感。值七夕有道人至廬所見之。歎其純孝。指架上道服曰。以是與我當有以奉報。大明與之無斲色。道人解腰間小瓢。貯衣其中。瓢口甚窄。而衣入無礙。俄取案間小黑石拊摩之。噓呵卽成紫金。又變藥末爲圓劑。以授大明。大明謝曰。身居貧約。且在父喪。不敢覬富壽也。道人益奇之。探瓢取道服還之曰。聊試君耳。題詩椽間曰。陽君真確士。孝行動穹壤。皇上憐其艱。七夕遣回往。逡巡藥頑石。遺子爲饋享。子旣不我愛。吾亦不汝強。風埃難少留。願子志勿爽。會當首鼠記。青雲看反掌。遂別去。鄉人聞者。競觀之。題處去地幾丈許。始以淡墨書。旣而墨色粲發。字體飛動。皆疑其神仙云。時紹興十三年也。里胥以事聞於縣。縣令李能。一白郡守。上諸朝。明年詔賜帛十疋。令長吏以歲時存問之。

運水銀

提要錄。元豐六年。呂吉甫守單州。聞天慶觀七月七日有異人過焉。索筆書二詩。其一云。野人本是天台客。石橋南畔有住宅。父子生來只兩口。多好歌坐不好拍。其二云。四海孤遊一野人。兩壺霜雪足精神。坎離二物全收得。龍虎丹行運水銀。時呂守之壻余中在傍。釋之曰。天台客賓也。石橋洞也。兩口呂字也。歌而不拍。乃吟詩也。吟此詩者。其呂洞賓乎。後篇乃是詩題耳。

殮松柏

孫真人枕中記。採松柏法。嘗以三月四月採新生松葉。可長三四寸。并花藥取陰乾細搗爲末。其柏葉取深山谷中。採當年新生可長三二寸者。陰乾細搗爲末。用白蜜和丸。如小豆大。常以月一十五日日未出

時燒香東向手持藥八十一丸以酒下服一年延一十年命服二年延二十年命欲得長肌肉加大麻巨勝欲心力壯健者加茯苓人參此藥除百病益元氣滋五臟六腑清明耳目強壯不衰老延年益壽神驗用七月七日露水丸之更佳服時乃咒曰神仙真藥體合自然服藥入腹天地齊年咒訖服藥斷諸雜肉五辛切忌慎之

餌松實

林氏傳信方七月七日取松實過時卽落難收去木皮搗如膏每服如雞子大日三服能絕穀久服昇仙渴卽飲水勿食他物服及百日身輕三百日日行五百里又法搗爲膏酒調下三錢亦可以煉了松脂同服之劉向列仙傳偓佺者槐山採藥父也好食松實形體生毛長數寸屈原九歌山鬼章云飲石泉兮飧松柏

服柏子

千金方七月七日採柏子治服方寸七日三四又云一服三今久服亦辟穀令人不老張華博物志云荒亂不得食細切柏葉水送下隨人能否以不飢爲度此葉苦不可嚼也老杜詩云翠柏苦猶食晨霞高可餐

取菖蒲

千金方七月七日取菖蒲酒服三方寸七飲酒不醉好事者服而驗之不可犯鋟若犯鋟令人吐逆治人

好忘久服聰明益智。

折荷葉

太清諸草木方七月七日採蓮花七分八月八日採蓮根八分九月九日採蓮實九分陰乾搗篩治服方寸七令人不老。

和桃花

章氏月錄七月七日取烏雞血和三月三日桃花末塗面及遍身三二日肌白如玉此是太平公主法曾試有驗。

曬槐汁

圖經本草按爾雅槐有數種葉大而黑者名樸槐晝合夜開者名守宮槐葉細而青綠者但謂之槐其功用不言有別四月五月開花六月七月結實治五痔七月七日採嫩實擣取汁銅器盛之日煎令可作丸大如鼠屎內竅中三易乃愈補絕傷火瘡婦人乳瘕子藏急痛千金方銅器盛寘高門上曝二十日上日卻煎令成膏作丸如前法又云神方主痔。

煎苦瓠

千金方七月七日生苦瓠中白絞取汁一合以醋一升古文錢七箇浸之微火煎減半以沫內眞中大治眼暗。

摘瓜蒂

本草瓜蒂苦寒有毒。主大水。身面四肢浮腫。下水殺蟲毒。食諸果病在胸膈腹中。皆吐下之。生嵩高平澤。七月七日採陰乾。陶隱居云。瓜蒂多用早青瓜蒂。此云七月採。便是甜瓜蒂也。

剪瓜葉

淮南子。七月七日午時。剪生瓜葉七枚。直入北堂中。向南立。以拭面。卽當滅矣。

拾麻花

外臺祕要。治療癰。七月七日拾麻花。五月五日收艾葉二件。作炷。於癰上灸百壯。

蒸麻勃

千金方。七月七日用麻勃一斗。真人參二兩末之。蒸令氣遍。夜欲臥。酒服一刀圭。盡知四方之事。本草云。麻蕡一名麻勃。此麻花上勃勃者。七月七日採良。

種天草

圖經本草。景天草生太山谷。今南北皆有之。人家多種於中庭。或以盆植於屋上。云以辟火。故又謂之慎火草。春生苗似馬齒而大。作層而上。莖脆。夏中開紅紫花。秋後枯死。神農本草云。景天草一名慎火。一名戒火。一名救火。七月七日採陰乾。

乾藍草

千金方解諸藥毒散七月七日取藍陰乾搗和水服方寸七日三服中毒者春燕毛二枚和水二升服之差。

吞小豆

韋氏月錄河圖記七月七日取赤小豆男吞一七女吞二七令人畢歲無病。

食海藻

本草海藻一名落首一名蘚七月七日採曝乾生深海中及新羅海人取藻正在深海底以繩繫腰沒水下得則旋繫繩上孟說云海藻起男子陰氣常食消男癩北人不宜食。

收公寄

本草云丁公寄味甘主金瘡痛延年一名丁父生石間蔓延木上細葉大枝赤莖實大如磧黃有汁七月七日採按陳藏器云丁公寄卽丁公藤也。

塗守宮

淮南子畢萬術七月七日採守宮陰乾爲末井花水和塗女身有文章似丹砂塗之不去者不溼去者有姦。

帶蛛網

千金方七月七日取蛛網一枚著衣領中勿令人知則永不忘也又日華子云蛛網七夕朝取食之令人

巧去健忘。

採蜂房

本草露蜂房有毒。主驚癇。一名蜂腸。一名百穿。一名蜂勅。生山谷。七月七日採陰乾。又圖經云。古今方書治牙齒傷多用之。七月七日採。

捉螢火

本草螢火無毒。生明目。小兒火瘡。一名夜光。七月七日取陰乾。藥性論云。螢火亦可單用治盲眼。

捕丹蟅

本草云。丹蟅味辛。主心腹積血。一名飛龍。生蜀郡。如鼠婦。青股赤頭。七月七日捕採。又云。七月七日採黃蟲。療寒熱。生地上。味苦。赤頭長足有角羣居。

燒赤布

淮南子畢萬術。赤布在戶。婦人留連。注云。取婦人月事布。七月七日燒灰置楣上。卽不復去。勿令婦人知之。

歲時廣記卷二十八

七夕下

食仙桃

漢武帝內傳。帝好神仙之道。元封元年正月甲子登嵩山。起道宮齋居禱祠。以求神應。至四月戊辰。帝方御宴殿。時東方朔及董仲君在側。忽有一女子來語。帝曰。聞子輕四海之祿。訪道求生。屢禱山川。似可教者。從今日始。清齋不交人事。七月七日。王母當暫至也。言訖。女子忽不見。帝問東方朔何人。朔曰。乃西王母紫蘭宮女。常傳命往來人間。帝於是登真臺。齋戒存道。至七月七日。灑掃宮掖。燔百和之香。然九光之燈。躬監香果。爲天官之饌。帝乃盛服。至于階下。勅內外謐寂。以候仙官。二更之後。忽見西南如白雲起。鬱鬱趨陛。須臾。王母乘雲輦而降。帝問寒暄畢。王母自設天廚。以仙桃飼帝。復召上元夫人與帝同宴。因授以五岳真形圖及靈光經。夫人亦以六甲靈飛十二事授帝。至明。王母與夫人同乘而去。

請仙藥

漢武帝故事。七月七日。上御承華殿齋正中。忽有青鳥從西來。集殿前。上問東方朔何鳥也。朔曰。此西王母欲降以化陛下。上乃施帷帳。燒貝末香。香聞百里。是夕漏七刻。西方隱隱若雷聲。有頃。王母乘雲車而至。玉女馭母。戴七勝。青氣如雲。上拜請不死之藥。母曰。帝滯情不盡。慾心尚多。

不死之藥未可致也。東方朔於朱雀牖中竊視。母曰：此兒好作罪過。久被斥逐。然原心無惡。尋當得還。母出桃七枚。自啖二枚。以五枚與帝。帝留核欲種。母曰：此桃三千年一結子。非下土所種之物。

乘白鶴

總仙記。王子喬者。周靈王太子晉也。好吹笙。一云吹簫作鳳凰鳴。遊伊洛間。遇道士浮邱公。接子喬上嵩高山。四十餘年。後於山中見桓良曰：告我家七月七日待我於緑氏山頭。至是果乘白鶴駐山頭。望之不得到。舉手謝時人。數日而去。時有童謠曰：王子喬好神仙。七月七日上賓天。白虎搖瑟鳳吹笙。乘雲鼓氣吸日精。吸日精長不歸。秋山冷露沾君衣。李太白鳳笙歌云：仙人十五愛吹笙。學得崑邱彩鳳鳴。始聞鍊氣殲金液。復道朝天赴玉京。玉京迢迢幾千里。鳳笙去去無窮已。綠雲紫氣向函關。訪道因尋緑氏山。莫學吹笙王子晉。一遇浮邱斷不還。司馬溫公緑山引云：王子吹笙去不還。當時舊物唯緑山。山深樹老藏遺廟。春月秋花空自閒。東坡七夕詞云：緑山仙子高情雲渺。不學癡牛駛女鳳簫聲。斷月明中舉手謝時人去。又詩云：蕭然王郎子。來自緑山陰。云見浮邱伯。吹簫明月岑。按寰宇記。緑山在明州。其地有祠在焉。鄭工部文寶題緑山王子晉祠一絕云：秋陰漠漠秋雲輕。綠氏山頭月正明。帝子西飛仙馭遠。不知何處夜吹笙。

跨赤龍

列仙傳。陶安公者。迺六安鑄冶師也。數行火術。一朝野火燄上紫色衝天。安公伏冶下求哀。須臾有朱雀